

**Baseli Berther, Rueras**

CR 1971, pag. 330



Ina aulta vegliadetgna, 83 onns, mo ella vegliadetgna schai adina ina certa madirezia dil carstgaun. Cargaus cun la peisa da quels onns ha il vegl president communal e deputau Baseli Berther da Dieri priu comiau da nus ils 24 da zercladur 1970. Ils davos onns da sia veta ha el saviu mirar anavos sil prestau cun satisfacziun.

Oriunds era il Baseli dalla ucliva da Dieri. Siu bab, il Sep da Dieri era sereratgs dalla casa paterna a Camischolas a Dieri. Lur casa a Camischolas, la casa ch'era aunc von buca tons onns habitada dil «capitalist» dils Tujatschins, digl aug da cursins dil Baseli, Giachen Martin Berther, veva gronda tradiziun. En ella eisi stau bia traffic, principalmein entuorn ils anno 1860 e sequents, nua che la via dall'Alpsu ei veginida baghegiada. Il tat dil Baseli, Duri Battesta e siu frar Giachen Martin, associai cun Castagnola da Lugano ed Augustin Condrau da Mustér, han eregiu quels onns il stradun dils confins da Mustér tochen a S.Brida. Inschignier era signur Depuoz, in pedant d'emprema classa. Quella interpresa ha purtau pauc gudogn. Meglier eisi iu da baghegiar il schinumna «Berchterskehr» da tschei maun dil cuolm d'Ursera. Da quei temps era la casa a Camischolas magazin da vuctualias, bubrondas, material etc. per igl entir consorzi. La casa a Dieri era veginida baghegiada mo levmein pil temps da fenar. Mo il Sep ei staus leu, e leu ha era il Baseli viu la glisch dil mund ils 30 d'october 1887. Sia mumma ei stada Maria Barla Deflorin.

La rauba che tat ed aug vevan fatg tras lur activitat sco surprendiders vevan ei investau en praus e funs. Perquei ei il sulet buob ensemens cun sia sora Maria Barla beinspert vegni sut il giuv dalla latur. Latur ha ei mai muncau a Dieri. Tonaton ha il Sep giu quitau d'instruir ed educar endretg siu fegl, ed ha tarmess el a scola on claustra, nua ch'el ha frequentau la preparanda e la reala.

Influenza sil giuven han segiramein giu siu aug che era en claustra, pader Baseli Berther e sur Tumaisch Berther. Onn per onn passentava igl umeneri, pader Baseli cun siu tgau sco in «fussbal» - sco in buob da Mustér ha da gliez temps giu caracterisau el - sias vacanzas a Dieri. Da leuanora ha el rimnau las numerusas notizias sur l'istoria tujetschina nudadas en ses carnets deponi ussa ella biblioteca romontscha. Quei fatg ha segiramein entschaliu il ferm ligiom tradiziunal. Denton para siu aug sur Tumaisch - in original da sum tocca dem - da ver influenzau internamein ed externamein pli da rudien il car defunct.

Segir ha sur Tumaisch, igl anterius plevon da Surrein, Vignogn e Platta dau anim e slontsch al giuven pur. Bein era sur Tumaisch en emprema lingia plevon e spiritual, mo el vuleva gidar il pievel spirtalmein e materialmein. Da quei dattan perdetga sias publicaziuns litteraras: «Relaziun denter scola e casa paterna», «Igl alcohol e sias consequenzas», «La cassa da Raiffeisen». Era ha el animau ed instruiu incontin ils giuvens purs. Aschia sedi ei che ils purs da Surrein hagien tuts stuiu alzar ils clavaus per ver plaz pil fretg il temps da sia dimora a Surrein.

Externamein, cun excepziun dalla cumparsa gigantica da siu aug, era il Baseli tagliau giu il tgau siu aug. Ils smanis cun tgau e bratscha fageva el ual sco lez. Il raschieni preferiu dil Baseli era il puresser. Prezis da tiers, qualitads da tiers, raschienis sur praus e pradas, baghetgs e nuegls, tut quei che scadin pur en nossas muntognas sto far: Spagnar, luvrar e buca duvrar memia, quei era iu vi en carn e saung. Tgei interess veva el dil menaschi da ses feglis che han surpriu il puresser digl uestgiu a Landquart. Cu el ei buca pli s'interessaus dil puresser, lu ha ins saviu, ussa va ei da rendiu.

Cun 25 onns ha il Baseli maridau la giuvna Mariuschla Gieriet che ha regalau ad el varga in tozzel affons. Endisch ein aunc en veta sis buobs e tschun buobas. Tuts ha el schau scolar ed era en cheu vesa ins l'influenza da siu aug sur Tumaisch, il piunier dalla scola. Dus feglis, sur Giusep, oz plevon a Lumbrein e sur Tumaisch, plevon a Falera, han astgau ascender igl altar dil Segner. Ils auters han tuts fundau ina atgna famiglia e tier sia mort veva el 54 beadis ni biadias e dus sutbiadiis.

Sper siu pensum da bab da famiglia ha el era aunc giu temps per differents uffecis ch'ils vischins han surdau ad el. Duront otg onns, dil temps dalla crisa, ha el presidiau la vischnaunca e quater onns eis el staus deputau dil Cussegl grond. Uffecis oz sbittai e ruffidai muort cumadeivladad ha el administräu

cunscienziusamein. Aschia eis el staus el cussegli da scola, onns ed onns ugau parvenda da Rueras e schi ditg sco ins sa seregurdar el chor baselgia da Rueras. Il Baseli, il Duri Vigeli Cavegn ed il vegl sur Venzin eran ils capo-cantadurs. Sur Venzin veva il grond dun da cantar da bass, il Duri Vigeli da cantar tral nas, mo il Baseli veva ina biala clara vusch. Beinenqual episoda ualtri comica savess ins raquintar da quei trio.

In original ei il Baseli staus buca en quei grau ch'el vess insistiu sin siu meini. El era accessibels pil meini dad auters ed in da ses plaids preferi era: «Gie, gliez stu ins schon era sche», ni «Gliez stu ins schon era di.» Dasperas prefereva el bein il vegl e cumprovau.

Era sia veta ha giu dis da sulegl ed umbriva. Ils pli bials dis eisi bein stau cu ses dus fegls han astgau ascender igl altar dil Segner, e lu cu el ha ils 19 da november 1962 astgau celebrar las nozzas d'aur entamiez ses endisch affons e roschada biadis e biadias. Mo la sera dalla veta era cheu, la vegliadetgna, la mendra malsogna. Avon quater onns ha sia buna consorta bandunau el. Cheu ha ina certa grevadetgna surpriu il bien Baseli. Mo adina ha la cardientscha dau sustegn e gidau el era ellas uras umbrivadas. Il davos eis el stiazzaus sco ina candeila seconsumada per far clar e mussar la via als auters. La glisch dil Segner sclareschi ad el!

P. Vigeli Berther

3.7.1971.

Nr. 53

## Nos morts

### Baseli Berther-Gieriet, Dieni



(Corr.) Sonda, ils 27 da zercladur ha in grond til da bara dau la davosa honur al defunct president e deputau Baseli Berther. A nus eis el pli enconuschents sut il num Baseli da Dieni. Praus e pradas plein speronza da dar ina gronda raccolta ein simbol dalla pagaglia ch'il defunct astga sperar.

Naschius eis el ils 30 d'october 1887. El ei staus il sulet fegl dil Sep da Dieni e Maria Barla Deflorin. Atgnamein ei pér il bab dil Sep sereratgs a Dieni ella casa che els vevan baghegian mo per il temps da fenar. Sco mintga buob tujetschin da gliez temps, eis el beinspert vegnius mess sut il giuv dalla lavur, e lavur muncava ei buca el grond menaschi puril. Siut e ses augs vegls vevan tras lur lavurs alla via dall'Alpsu gudignau bi e bein e lura cumprabia e bi prau persuenter. Aschia ha ei mai muncau lavur tier Baseli e tiels da Dieni. Il Sep ha tonaton aunc tarmess el a scola on claustra, nua ch'el ha absolvii la preparanda e la reala.

Cun 25 onns ha il Baseli maridau sia fideivla cunsorta la Mariuschla Gieriet che ha regalau ad el varga in tozzel affons, endisch da quels ein aunc oz en veta, sis buobs e tschun buobas. Dus dad els han astgau ascender igl altar dil Segner, il vegl da tutz sur Giusep, ussa plevon a Lumbrein e sur Tumaisch plevon a Falera. Era ils auters ha el schau scolar ulteriuramein. Quei fatg ei in clar mussament dil spert svegliau e progressiv dil car defunct.

Quei spert han era ses vischins cattau ad agur e surdau ad el differents uffecis, en vischnaunca ed ordeifer. Ils onns dalla crisa ha el presidau duront otg onns la vischnaunca e quater onns eis el staus deputau al Cussegl grond. Denton, era lavurs ed uffecis oz quasi sbittai, ha el buca rufidau mobein administräu cunscienziusamein. Aschia eis el staus el cussegl da scola, onns en ed onns ora ugau della caplania a Rueras e schiditg sco ins sa sereguardar el chor baselgia da Rueras. Il Baseli, il Duri Vigeli Cavegn ed il

vegl sur Venzin eran ils capo-cantadurs. Il sur Venzin veva in grond dun da cantar da bass, il Duri Vigeli il dun da cantar tral nas, mo il Baseli veva ina biala clara yusch. Beinenqual comica episoda savess ins raquintar da quei trio e sch'il «Pign Cavegn» vegneva aunc cun siu «In exitu Israel de Egipto» lu fuva ei si l'aura per nus buobs.

In original d'atgna pasta ei il Baseli staus. Mai vess ins saviu pareglier el cun siu aug P. Baseli, igl um d'autoritat da sum tochen dem, schebi che el tschintschava adina cun aulta stema dil P. Baseli. Plitost vess ins saviu trer ina parallela denter el e siu aug sur Tumaisch Berther che ha pastorau a Sedrun, Surrein, Vignogn e Platta, in original da sum tochen dem. Il Baseli era accesibels pil meini dad auters ed in da ses plaids preferi era: «Gie gliez stu ins schon era schè», ni «gliez stu ins schon era di», mo dasperas teneva el cul vegl. Caracteristics eran ses smanis cun la bratscha e cul tgau. Lavur era per el il medem sco far il pur, e pur eis el staus dil taliter. Lavurs dil puresser, prezis da tiers, qualitat da tiers, raschienis sur praus e pradas, baghetgs e nuegls, insumma tut quei che interessescha il pur, per quei veva el adina interess. Era quei che scadin pur en nossas muntnognas sto far; sparnar e gie buca duvrar memia e buca schar custar memia, quei era iu vi en carn e saung. Cu el ei buca pli s'interessaus da quei dil menaschi da purs dils ses, gie, lu ha ins saviu, ussa va ei da rendiu.

Il Baseli ha stuiu luvrar e barhar per trer vi sia famiglia, mo astgar luvrar ei stau siu deletg, ei stau siu viver. Ils plaids d'in auter Tujetschin ch'ha detg essend vegls e caducs: «Quei ei il pli grev di da mia veta, perquei che jeu vesel che jeu sai buca luvrar pli», han segiramein era valiu per el. Mo era quella crusch ha el pertau sco ver cristifideivel, ed il desideri da saver ir a messa, ha schau bandunlar el en ses vegls dis ils da Dieni ed ira egl asil da s. Vigeli a Sedrun.

Bials e meins bials dis ha il Baseli, sco nus tutz, astgau passentar cheu sin tiara. Bials dis — jeu creiel ils pli bials — eisi stau cu el ha astgau menar a casa sia cunsorta, la Mariuschla, cu ses dus fegl han giu messa niviala e lu el ensemen cun sia cunsorta e cun ses endisch affons e roschada beadis e beadias han astgau celebrar las nozzas d'aur ils 19 da november 1962. Lu ei la sera dalla veta stada cheu, la vegliadetgna, la mendra malsogna, che vegn di per di mendra e mendra. Avon quater onns ha aunc sia buna cunsorta bandunau el ed ida sur cuolm. Cheu ha malsogna e fleivlezia ed ina certa grevedetgna surpriu il bien Baseli, era per ils ses ina greva crusch. Mo adina ha la cardientscha dau su stegn, ed il davos eis el stizzaus sco ina candeila seconsumada per far clar e mussar la via. Possi Jesus Cristus, il qual el ha invocau tontas gadas cantond ella litania da siu s. num: «Jesus dulcissime» mussar ad el la dultschezia e bellezia dil parvis. R.I.P.